

Erich Bolinius

Bericht zum Spiel Kickers Emden : SV Meppen am 10.4.2011 für Kickers-Kurier

Leev Toekiekers,

vandaag steiht hier in de „Deicharena“ in Emden ´n heel besünner Spöl an. Uns Kickers-Mannskupp spölt tegen SV Meppen un dat geiht um de eerst Tabellenplatz in de Oberliga Neddersassen. Meppen liggt wall noch mit 55 Punkten vör de tweed Mannskupp van VFL Osnabrück mit 54 un Kickers Emden mit 53 Punkten heel vörn, man Kickers hett een Spöl minner as Meppen maakt. Kann Kickers vandaag dat Spöl winnen, dann hett de Mannskupp een Punkt mehr up ´t Konto as Meppen un is geföhlt Tabellenföhrer, ok wenn Osnabrücks tweed Mannskupp villicht noch vörn liggt. Man de hebben al veer Spölen mehr as Kickers un blot een Punkt mehr haalt. De sacken in de komende Tied noch of, dorvan bün ik overtügt.

Vandaag kummt mit Meppen de Mannskupp, de mit 60 Toren an meesten skoten hett. Man Kickers Emden hett mit 20 Toren – dank Torwart Hergen Gerdes un de hele Achtermannskupp - an minnsten rin kregen. Dat word spannend, wo de Taktik von Meppens Trainer Johann Lünemann, de lesd Jahr ja noch in Emden för Kickers an d` Kant stunn, un Emdens Trainer Uwe Groothuis utsücht. De is een groot Sörg lös. Kickerstörmer Andreas Gerdes-Wurpts, de tegen Goslar de Rood Kaart kregen hett, kann uplopen. Dor kann he sük bi de Skandarms bedanken, dat dat so is. Harren de nix tegen dat Spöl unner Floetlücht an Freedagabend hat, dann harr Andy neet spölen dürs, was he doch för 14 Daag speert worden. Man vandaag is de Speer oflopen un Andy kann bewiesen, dat he een van de beste Störmers in de Oberliga Neddersassen is.

Hopen wi, dat dat up Platz un umtoe fredelk toe geiht un dat wi Toekiekers ´n moi, spannend Spöl toe sehn krieggen. Worbi ik natürelk hoop, dat uns Kickersmannskupp dat Spöl winnt – un dorför drück ik beid Dumen heel fast.

Mit hartelk Gröten

Erich Bolinius

PS: Elke Dönnerdag kummt um fiev Menüten na Klock seß up Radio Oostfreesland „Flutlicht das Kickersmagazin“. Dor word ok elksmaal ´n Bericht van dat lesd Kickerspöl up Platt sendt. Hört maal rin.